

re (quod esset irtcumque tolerandum) sed etiam malis præfigitionibus, ac propemodum minis deterrere. Nam quid aliud significant ea verba, *Per definitionem, quæ petitur, surgent disputationes, tranquillitas Ecclesiae turbabitur, aliaque sequentur incommoda?* Sed mihi crede, numquam a te, tuique similibus timebit Ecclesia. Alas in sinu, quæ velis, portenta. Cum enim edideris, præsto erunt bellatores fortissimi, qui ea jugulent, atque prosternant. Nunc ad reliqua pergendum est, eaque a nobis sunt refellenda, quæ secundo loco adversarius proposuit, ut Ecclesiae non expedire probaret, quam postulamus, definitionem. Narrat ille, diu, multumque de hac re deliberatum; nec tamen haec tenus definitum Mysterium Immaculati Conceptus: Pontifices aliquot magnis Theologis imperasse, ut, quæ melior sententia videretur, commentando investigarent: id egregios Thomistas præstitisse, tanta cum laude, ut Pontificibus eam mentem injecerint, nihil esse in hac quaestione promovendum. Quos ille triumphos canere possit, sane non video; qui probe sciam, Pontifices omnes, quos idem ipse commemoravit, Conceptionem immaculatam privilegiis ornasse; pie-tatem populi Christiani erga illud Mysterium summis laudibus extulisse. Hoc maxime doleo, mentionem ab eo fieri impudentissimi auctoris Bartholomaei Spinæ, cuius auditio nomine, si me negem ad iracundiam commoveri, equidem mentiar. Lege, quo, propositiones quatuordecim, quas anonymous auctor ex ejus libro decerpserit, qui est inscriptus de corruptione generis humani (a).

1. *Modus dicendi, Beatam Virginem præservatam fuisse a peccato originali, nec est rationabilis, nec fidelis.*

2. *Excipere ab originali aliquem propagatum seminaliter ex Adamo, est hereticum.*

3. *Pontifici promissa est assistentia Spiritus Sancti in rebus fidei, & regiminis spiritualis, sed cum conditione, nimirum si faciat id, quod in se est, ad hoc ut dirigatur a Spiritu.*